



REPUBLIKA E KOSOVËS / REPUBLIKA KOSOVA

KPPP.nr.1018/22

GJYKATA KOMERCIALE E KOSOVËS, Dhomat e shkallës së parë, Departamenti për Çështje Ekonomike, Gjyqtarja Verona Dibra, në çështjen përmbarimore të kreditorit “F...” SH.P.K., me NRB: ...., me seli në Lagjen .... rruga “....”, Prishtinë, të cilin sipas autorizimit e përfaqëson Liman Musa avokat nga Ferizaj, kundër debitorit “E...” SH.P.K, me NUI: ...., me seli në Prishtinë, rruga “...”, nr. ...., të cilën sipas autorizimit e përfaqëson Zyra Ligjore Pro Juris Law Firm, duke vendosur lidhur me prapësimin e debitorit të ushtruar kundër Urdhrit Përmbarimor P.nr.627/2021 të datës 21.09.2021, të Përmbaruesit Privat Besnik Aliu, me seli në Ferizaj, jashtë seancës, me datë 25.01.2023, merr këtë:

A K T V E N D I M

- I. REFUZOHET në tërësi si i pabazuar prapësimi i debitorit E... SH.P.K., i paraqitur kundër Urdhrit Përmbarimor P.nr.627/2021 të datës 21.09.2021, të Përmbaruesit Privat Besnik Aliu.
- II. MBETET NË FUQI Urdhri Përmbarimor P.nr.627/2021 i datës 21.09.2021, i lejuar nga Përmbaruesi Privat Besnik Aliu.
- III. DETYROHET debitori që në emër të shpenzimeve përpilimin e përgjigjes në prapësim t'ia paguaj kreditorit shumën prej 78.00 € (shtatëdhjetë e tetë euro) në afat prej 7 (shtatë) ditësh, pas plotfuqishmërisë së këtij aktvendimi.

A r s y e t i m

Përmbaruesi Privat, duke vepruar sipas propozimit të kreditorit, ka lëshuar urdhrin përmbarimor P.nr.627/2021 të datës 21.09.2021, me të cilin ka lejuar përmbarimin, në bazë të dokumentit të besueshëm Faturës nr.R52710 të datës 09.07.2021, duke urdhëruar debitorin që në

afat prej 7 ditësh nga dita e pranimit të këtij urdhri t'ia paguaj kreditorit shumën prej 710.00 €, me kamatë ligjore prej 8% nga data e lëshimit të faturave e deri në pagesën definitive si dhe shpenzimet e procedurës përmbarimore, me ndalimin e mjeteve në para të cilat debitori i ka në llogaritë bankare në të gjitha bankat komerciale në Kosovë, dhe bartjen e shumës përkatëse tek përmbaruesi privat e pastaj në llogarinë bankare të kreditorit si dhe regjistrimin, sekuestrimin, vlerësimin dhe shitjen e sendeve të luajtshme dhe të paluajtshme të debitorit, ashtu që të paguhet borxhi i kërkuar i kreditorit.

Debitori në prapësimin e paraqitur brenda afatit ligjor, ka dekluar se e kundërshton këtë urdhër për përmbarim për shkak se dokumenti në bazë të cilit është marr vendimi përmbarues ose urdhri përmbarues, nuk është dokument i besueshëm në bazë të LPP-së. Ka shtuar se urdhri për përmbarim nuk është i rregullt dhe nuk i plotëson kërkosat e nenit 38 paragrafi 1 dhe 2 të LPP-së, sipas të cilit propozimi për përmbarim duhet të ketë edhe nënshkrimin e faturës së pranuar dhe datën e përbushjes vullnetare të detyrimit e të cilat i mungojnë këtij urdhri përmbarimor. Më tutje ka theksuar se debitori në asnjë rast nuk i ka kundërshtuar detyrimet kontraktuale, mirëpo ka kërkuar që kreditori t'i dorëzoj faturat në mënyrë të rregullt si është e paraparë me ligj dhe në afatin parativ debitori do t'i shlyej detyrimet monetare. I ka propozuar që të aprovohet prapësimi i debitorit, të anulohet urdhri për përmbarim dhe të obligohet kreditori që t'i bartë shpenzimet përmbarimore në tërësi.

Kreditori, në afatin e paraparë ligjor ka parashtruar përgjigje në prapësim, duke i kundërshtuar në tërësi pretendimet e debitorit si të pabazuara duke theksuar se debitori nuk ka arritur që me asnjë provë materiale ti vërtetoj pretendimet e tij dhe se qëllimi i vetëm i debitorit është vonesa dhe shtyrja e përmbarimit. Tutje ka theksuar se nuk ekzistonë asnjëra nga kushtet për anulimin e urdhrit për përmbarim, pasi që i njëjti është nxjerrë konform dispozitave të LPP-së dhe i përban të gjitha tiparet e dokumentit të besueshëm ashtu siç është paraparë me nenin 29 par.1.3 të LPP-së. Më tutje ka shtuar se fatura është dorëzuar rregullisht, është vulosura me çka vërtetohet se e njëjta nuk është kontestuar nga debitori, e po ashtu përpos pranimit të mallit dhe shërbimit debitorit ju kanë drejtuar edhe me komunikim të vazhdueshëm për përbushjen e obligimeve. I ka propozuar gjykatës që të refuzohet si i pabazuar prapësimi i debitorit dhe urdhri

për caktimin e përmbarimit të mbetet në fuqi si dhe i ka kërkuar shpenzimet në emër të përpilimit të përgjigjes në prapësim në shumën prej 208.00 €.

Gjykata pas shqyrtimit të pretendimeve të debitorit të paraqitura në prapësim dhe kundërshtimeve të kreditorit nga përgjigja në prapësim dhe pas shqyrtimit dhe vlerësimit të provave që gjenden në shkresat e lëndës, si dhe duke iu referuar dispozitave të nenit 69 dhe 71 të Ligjit Nr. 04/L-139 për Procedurën Përmbarimore (tutje LPP), gjeti se prapësimi i debitorit është në tërësi i pabazuar andaj të njëjtin e refuzoi dhe vendosi si në dispozitiv të këtij Aktvendimi, për shkaqet si në vijim:

Gjykata vlerëson se në rastin konkret fatura në bazë të së cilës është lejuar urdhri për përmbarim, i plotëson kushtet për të qenë dokument i besueshëm dhe i përmban të gjitha elementet e kërkura, në përputhje me nenin 29 dhe 37 të LPP-së.

Sipas nenit 29 par.1 të LPP-së, përcaktohet se “*Përmbarimi me qëllim të realizimit të kërkësës në të holla caktohet edhe në bazë të dokumentit të besueshëm*”, me paragrafin 3 të po të njëjtin nen, përcaktohet se “*Dokumenti i besueshëm është i përshtatshëm për përmbarim po qe se në të është treguar kreditori dhe debitori, si dhe objekti, lloji, shuma dhe koha e përbushjes së detyrimit monetar* “, ndërsa me nenin 37 të LPP-së, përcaktohet se “*Kur propozimi për përmbarim paraqitet në bazë të dokumentit të besueshëm, mjafton që propozimit t'i bashkëngjitet dokumenti i tillë original apo kopja e tij e vërtetuar sipas ligjit.*” dhe sipas nenit 29 paragrafit 1 nën paragrafit 1.3 të LPP-së fatura është përcaktuar si dokument i besueshëm, sipas të cilit mund të caktohet përmbarimi për realizimin e kërkësës në të holla.

Në rastin konkret gjykata vlerëson se urdhri i lejuar nga ana e përmbaruesit privat bazohet në dokumentin e besueshëm përkatesisht Faturën nr. R52710 të datës 09.07.2021 në shumën prej 710.00€, e cila i përmban të gjitha tiparet e dokumentit të besueshëm sipas nenit 29 par. 3 të LPP-së, meqenëse në këtë faturë, janë treguar palët, përkatesisht kreditori dhe debitori, janë të përshkruara shërbimet të cilat kanë qenë objekt i faturës, është përcaktuar shuma e cila është detyrim për përbushje nga ana e debitorit si dhe koha e përbushjes së këtij detyrimi dhe e njëjta është pranuar nga debitori në mënyrë të rregullt.

Gjykata vlerësoi pretendimet e debitorit se urdhri për përmbarim nuk është i rregullt dhe nuk i plotëson kërkesat e nenit 38 paragrafi 1 dhe 2 të LPP-së, sipas të cilit propozimi për përmbarim duhet të ketë edhe nënshkrimin e faturës së pranuar, mirëpo gjeti se të njëjtat janë të pabazuara, për faktin se fatura në bazë të së cilës është lejuar përmbarimi mban vulën e debitorit dhe nga vet fakti se personat të cilët e kanë vulosur faturën i është dhënë vula në posedim vërtetohet se të njëjtit kanë qenë të autorizuar për pranimin e faturave.

Gjykata po ashtu vlerësoi pretendimet e debitorit se propozimi për përmbarim nuk përban datën e përbushjes vullnetare të detyrimit dhe gjeti se të njëjtat nuk gjejnë mbështetje ligjore sepse në rastin konkret fatura i plotëson kushtet e përcaktuara për zbatimin e përmbarimit në bazë të dokumentit të besueshëm për faktin se afati i përbushjes së detyrimit është përcaktuar në faturë dhe në propozimin për përmbarim siç parashihet me dispozitën e nenit 40 par 1.2 të LPP-së, i cili përcakton se: “*1. Propozimi për përmbarim në bazë të dokumentit të besueshëm duhet të përbajë:... kërkesën që organi përmbarues ta detyrojë debitorin e përmbarimit që brenda afatit prej shtatë (7) ditësh, kurse në kontestet nga raportet ku ekziston kambiali dhe çeku brenda afatit prej tre (3) ditësh, nga dita në të cilën i dorëzohet aktvendimi ta përbushë detyrimin bashkë me shpenzimet e caktuara...*”. Për më tepër fatura e cila nuk përban afat të përbushjes nga data e lëshimit të faturës, nënkuftohet se afati për përbushje arrin menjëherë respektivisht në datën e lëshimit të faturës.

Sa i përket shpenzimeve të procedurës përmbarimore, gjykata ka vendosur në kuptim të dispozitave të nenit 463 dhe 453 të LPK-së, lidhur me nenin 17 dhe 13 të LPP-së, duke ia njojur shpenzimet e të autorizuarit të kreditorit për përpilimin e përgjigjes në prapësim dhe atë në shumën prej 78.00 € (shtatëdhjetë e tetë euro), siç është e përcaktuar me rregulloren në fuqi për tarifat e avokatëve, të datës 18.03.2017 të Odës së Avokatëve të Kosovës.

Andaj bazuar në të lartcekurat, gjykata vlerëson se në rastin konkret nuk ekziston asnjëra nga bazat ligjore mbi bazën e të cilave do të mund të anulohet urdhri për lejimin e përmbarimit nga shkaqet e parashikuara në nenin 71 të LPP-së, ndërsa në kuptim të nenit 73 të LPP-së, lidhur me prapësimin e debitorit ka vendosur jashtë seancës gjyqësore.

Nga arsyet e paraqitura më lart dhe duke u bazuar në nenin 73 të LPP-së, nenin 13 par.1 nën par 1.2 të Ligjit nr. 08/L-015 për Gjykatën Komerciale, u vendos si në dispozitiv të këtij aktvendimi.

**GJYKATA KOMERCIALE E KOSOVËS**

Dhomat e Shkallës së Parë - Departamenti për Çështje Ekonomike

KPPP.nr.1018/22, datë 25.01.2023

Gjyqtarja

Verona Dibra

**KËSHILLA JURIDIKE:** Kundër këtij aktvendimi palët kanë të drejtë ankesë në afat prej shtatë (7) ditëve, nga dita e pranimit të aktvendimit, në Dhomat e Shkallës së Dytë, në Gjykatën Komerciale të Kosovës, përmes Dhomave të Shkallës së Parë të kësaj Gjykate.